

ՍԵՎԱՆ ՀԱՄԱՅՆՔԻ ՂԵԿԱՎԱՐ ՍԱՐԳԻՍ ՄՈՒՐԱԴՅԱՆԻ ՈՒՂԵՐՁՆ ԸՆՏԱՆԻՔԻ  
ՄԻՋԱԶԳԱՅԻՆ ՕՐՎԱ ԱՌԹԻՎ

Սևան համայնքի հարգարժան բնակիչներ,

Սիրելի հայրենակիցներ

Շնորհավորում եմ բոլորիս Ընտանիքի միջազգային օրվա առթիվ, որը Հայաստանի Հանրապետության օրացույցում ամրագրվել է 2011 թվականից:

Ընտանիքը հասարակության հիմքն է, որտեղ ձևավորվում է վաղվա քաղաքացին, որտեղ կամրջվում է սերունդների ճանապարհը, որտեղ ձևավորվում է ծնողների և զավակների, ավագների և կրտսերների հոգևոր կապը:

Ընտանիքների միջոցով և նրանց շնորհիվ է հասարակությունը դառնում ինքնաբավ և ուժեղ, դիմակայուն և կայացած, ընտանիքը արժեհամակարգ է, որտեղ ձևավորվող սերը, հավատարմությունը, նվիրումն օգնում են լինել առավել նպատակասլաց և ինքնավստահ:

Անկախ հոգեբանական, սոցիալական, ֆիզիկական դժվարություններից՝ մեր ընտանիքները կարողացել են ինքնակազմակերպվել, դառնալ առավել համերաշխ ու հանդուրժող:

Կայուն ու կայացած ընտանիքը մեր առողջ ու ներդաշնակ հասարակության հիմքն է, որտեղից սկսվում է մարդու կյանքը:

Ցավոք, մեր ընտանիքների սրտի միջով անցել են մեզ պատուհասած դժբախտություններն ու պատերազմները՝ թողնելով իրենց անդառնալի հետքն ու կորստի մեծագույն ցավը:

Զորակցությունս եմ հայտնում թանկ կորուստներ կրած մեր ընտանիքներին: Գիտեմ՝ դուք ապրում եք բարդ ու դժվարին ժամանակաշրջան, սակայն վստահ եղեք, որ պետությունն ու համայնքը ձեր կողքին են և միաժամանակ ոգեշնչվում են ձեր ներկայությամբ:

Շնորհավորում եմ նորաստեղծ ընտանիքներին, որոնք նոր շնչառություն և գույն են հաղորդելու մեր համայնքին:

Սևան համայնքի ընտանիքների կողքին այսօր բնակվում են արցախցի ընտանիքները, որոնք անցել են դժվարին ճանապարհ և իրենց հանգրվանը գտել են այստեղ: Մեր հայրենակիցներին մաղթում են ոգու կորով, անսասան կամք, պահեք ու պահպանեք ձեր լավագույն ավանդույթներն ու ընտանեկան արժեքները, իսկ մենք կանենք հնարավորը, որ դուք ձեզ զգաք ապահով ու հարազատ միջավայրում, վերագտնեք ձեր հոգու խաղաղությունը:

Այս գեղեցիկ ու ջերմ տոնի առթիվ շնորհավորում եմ մեր համայնքի բոլոր ընտանիքներին, իմ շնորհավորանք-բարեմաղթանքներին միանում են համայնքի ղեկավարի աշխատակազմը, բնակավայրերի վարչական ղեկավարները, համայնքի ավագանու անդամները:

Գնահատենք այն, ինչը ծնվում է ընտանիքում, ինչը ընտանիքի շնորհիվ վերադառնում է հասարակություն:

Այսօր յուրաքանչյուր ընտանիք ունի առավել մեծ առաքելություն՝ իր կենսունակությամբ, ներդաշնակությամբ նպաստելու մեր համայնքի ու երկրի զարգացմանը՝ դառնալով ամուր հենարան, կրողը լավագույն արժեքների:

Ցանկանում եմ, որ մեր ընտանիքներն ապրեն խաղաղ ու անվտանգ պայմաններում, մաղթում եմ սեր և միություն, առողջություն ու երջանկություն, մեր ծնողներին և զավակներին՝ ընտանեկան ջերմություն, ներդաշնակ, բարեկեցիկ և ապահով կյանք:

Աստված պահապան բոլոր ընտանիքներին: